

21 OCT 2001

Sarawak-Pekerjaan

MTUC MINTA PM CAMPUR TANGAN LAKSANA AKTA PEKERJAAN KE SARAWAK

KUCHING, 21 Okt (Bernama) -- Kongres Kesatuan Sekerja Malaysia (MTUC) akan meminta Perdana Menteri Datuk Seri Dr Mahathir Mohamad campur tangan dalam menyelesaikan penangguhan pelaksanaan Akta Pekerjaan di Sarawak.

Presidennya Senator Zainal Rampak berkata beliau akan menulis surat meminta Dr Mahathir mempercepatkan penguatkuasaan akta itu bagi memanfaatkan golongan pekerja di negeri ini.

"Surat itu akan siap esok. Saya akan menyerahkan surat itu kepada Dr Mahathir demi lebih 100,000 pekerja di Sarawak," katanya kepada pemberita selepas merasmikan Persidangan Perwakilan 30 tahun Pertama Bahagian MTUC Sarawak di sini, hari ini.

Zainal berkata perbincangan untuk melaksanakan akta itu di Sarawak antara kerajaan negeri dan kerajaan persekutuan kini berlarutan lima tahun.

"Kami masih bingung apa sebenarnya yang menyebabkan kelewatan itu. Pekerja di negeri ini tertanya-tanya dan sering bertanya kepada saya, berapa lama mereka harus menunggu, satu minggu, satu bulan atau setahun lagi? katanya.

Zainal berkata MTUC tidak akan berdiam diri mengenai perkara itu selagi kerajaan negeri tidak memberi bantuan dalam melindungi hak pekerja di Sarawak.

"Apa gunanya akta itu jika ia tidak melindungi pekerja...lagi lama ia dilewatkan, lagi banyak kerugian dialami pekerja," katanya.

Menurut Zainal satu daripada manfaat utama akta itu ialah ia melindungi pekerja terutamanya mereka yang diberhentikan majikan.

Bagaimanapun, katanya MTUC setakat ini belum menerima laporan pekerja diberhentikan oleh sektor swasta di Sarawak.

Mengenai peningkatan harga minyak sebanyak 10 sen, beliau berkata MTUC berharap kerajaan akan mengkajinya berikutan kenaikan harga minyak baru-baru ini.

Menurutnya peningkatan minyak akan membebankan para pengguna di kawasan luar bandar terutamanya mereka yang menggunakan minyak untuk jentera pertanian, set generator dan enjin luaran yang membolehkan bergerak dari satu tempat ke tempat lain.

-- BERNAMA

FLL MT NAK